

---

# Avabûn

## Eyûb Reşîd Nisrî

Ka destên xo  
Da tilên min ji dil bimêjin  
Li şehyana  
Aşopa du evîndaran  
Semayê biken  
Da hestên min yên aryaî  
Bi vê semayê hawîş bibin

\* \* \*

Roj ya xo vedşêrît  
Ditirsît ronahîya wê  
Vê dîfina me  
Bikete qaçkê devê xelkî  
Şûna kuçkên balavîyan  
Li ser şaşên mubaylan  
Bilutos pê mijûl bibin

\* \* \*

Avabûn

Ew firîştaya çakîyêye  
Dê di nav perdên tarîyê da  
Hêlînekê bo me çêket  
Da em di nav da xinê bibîn  
Min divêt ez jî wekî rojê  
Di asoyê çavên te da  
Ava bibim  
Bihêle da di nav mijûlankên te da  
Bo cara dumahîyê  
Avrîyekê li cîhana xemên xo bidem  
êdî biçim li cîhana hezên xo tena bibim

\* \* \*

Avabûn  
Dumahîya serhafîyeka xemnake û  
Beref cîhana Bextiyarîyêye  
Were tu jî  
Di asûyî çavên min da  
Ava bibe  
Li nav beheşta dilê min da aram bibe